

Dei unge stemmene

Landsforeningen for barnevernsbarn og Forandringsfabrikken delte i år på heideren ved at dei blei tildelte Karl Evang-prisen for arbeidet for at barn og unge skal få bruke røysta si i samfunnet og bli høyrde i saker som gjeld dei sjølve.

– Brukarrøynsle er like verdifull som annan kompetanse. Vi har ein god dialog med styresmaktene, og høyrer dei ikkje på oss, står vi på og prøver igjen, sier Ruzzel Abueg, som er styreleiar for dei om lag 300 medlemmene i Landsforeningen for barnevernsbarn.

Foreininga lèt seg høyre i mange saker. Eit knippe saker er ettervern, brukarmedverknad, einslege, mindreårige asylsøkjjarar og kampen for å gjere barn og unge merksame på kva rettar dei har.

– I år har vi satsa på å styrkje organisasjonen internt. Det er viktig for å få til ein solid organisasjon. Vi får mange førespurnader til kontoret om å delta på føredrag, konferansar og møte, men i år har vi måtta velje nøye kva vi skulle ta del i, sier Ruzzel, som til dagleg studerer på Høgskolen i Oslo og Akershus til å bli barnevernspedagog. Det blir mange timar med frivillig arbeid for ein student.

Brukarmedverknad

Ruzzel Abueg engasjerer seg i Landsforeningens arbeid fordi ho gjerne vil bruke røynslene sine frå barnevernet på ein god måte.

– Eg trur det er på tide at politikarane fokuserer på brukarmedverknad. Vi treng betre rutinar for å høyre barn og unge når barnevernet skal avgjere kva som skal skje med dei. Dei vaksne skal setje grenser, men dei unge har meiningar om saka si. Til dømes kan dei få vere med på ansvarsgruppemøta. Ettervernet er ei anna viktig sak for Landsforeningen.

– Barne- og likestillingsdepartementet har gjort ein god jobb når det gjeld forskrift og rundskriv om ettervern, men framleis er det for få som får dette til dei blir 23 år. Ein 18-åring er ikkje godt nok førebudd på vaksenlivet aleine, og ein ungdom treng ein stad å dra tilbake til når ting kan bli litt vanskelege, seier Ruzzel Abueg. Landsforeningen for barnevernsbarn (LFB) er både ein interesseorganisasjon og ein medlemsorganisasjon. Organisasjonen bidrar med dei røynslene medlemmene har, når han arbeider for eit stadig betre og meir høveleg barnevern i Noreg. Organisasjonen har som oppgåve å sikre denne kunnskapen og å forvalte og formidle han på best mogleg måte til omverda. LFB har vore med på å fjerne fordommar mot barnevernet og har medverka til at rettstryggleiken for barna har auka.

Forandringsfabrikken

Den andre prisvinnaren, Forandringsfabrikken, har i meir enn ti år arbeidd for barn og unge. Forandringsfabrikken legg til rette for at ungdom skal komme i direkte kontakt med makta og såleis gi svar på korleis systema bør endrast. Forandringsfabrikken har vist at dei arbeider langsiktig, har gjennomføringsevne og går inn i vanskelege tema for samfunnet.



Ruzzel Abueg og Marit Sanner mottok prisen på vegne av Landsforeningen for barnevernsbarn og Forandringsfabrikken. Foto: Magne Braaten

Karl Evang-prisen

Karl Evang-prisen blir årleg delt ut til ein person eller ein organisasjon som har gjort ein særskild og framifrå innsats for å fremje anten folkehelsa og sosiale tilhøve knytte til denne, rettstryggleik og tryggleik i barnevernet, helse- og sosialtenestene eller opplysningsarbeid og deltaking i samfunnsdebatten om viktige spørsmål på desse områda. Det blir lagt vekt på at dei som får prisen har ytt ein innsats utover det ein ventar.